



A PIAZZETTA

U PRIMU TABLOID
GRÀTISI IN
LINGUA CORSA

0€

I rigali di Natale

ch'ellu ci vole à fà... o nicca !



**E vere dumande
ch'ellu ci vole à ponesi**



**Ciò chi s`hè
veramente passatu...**



INTERVISTA 1N2 INCÙ LOUIS FRANCESCHI

Ciò chì s' hè veramente passatu...



Razzisimu

Lionel Messi vince u Ballone d'Oru di France Football. Salim Arrache ùn hà avutu nisun votu...

Facciabeccu

Oghje, Emile Zuccarelli hà 63 amichi nant' à Facebook. U gruppu « Pétition pour le retour du Bigdil » hà più di 376 000 membri. Arrestemu quandu cun Facebook ?



Basket

A manu di Thierry Henry permette à a Francia d'andà à a Cuppa di u mondu di futbol in Sudafrica.

Cose di u seculu passatu

U minitel, u muru di Berlinu, u top 50, Dorothée, Georges Marchais, u SCB...

Piston

Pulèmica internaziunale cù a candidatura di u corsu Jean-Jean Sarkozy-Culioli à u capu di l'EPAD. Sì in più di quessa u piston venia à esse pruibitu, induve anderà a Corsica ?

Allovinu



Serata d'Halloween à a sala di e feste di U Borgu. Nimu hà rimarcatu a presenza di Paul Natali.

Le Beaujolais Nouveau est arrivé : riparte quandu ?

Apiazzetta.com lancia una campagna anti-Beaujolais : s'ellu hè per beie vinaccia, almenu biite vinaccia nustrale, ùn hè micca ciò chì manca...



Disegnu di Sbondacageot

Koghju Lanta

Goffi

L'Inghilterra deprimeghja. S'ampara ch'elli sò elli i più goffi di u mondu d'appressu à u situ beautifulpeople.com. Hè un situ di scontri chì ùn accetta ch'è a « ghjente bella » dop' à avè analizatu a vostra chigna. L'Inglesi ùn anu ch'è 15% di riescita, contr'à 76% per i Nurvegiani è 65% per i Svedesi. Ùn si sà si Jean-Pierre Treiber hè statu pigliatu.



Jean-Pierre Treiber dettu « L'Homme des bois » hè statu chjappu trè mesi dopu à essesi fughjitu in un cartone da a prigiò d'Auxerre. A Francia sana fantasmava davant' à quella chì campava in e fureste bughje di Seine et Marne. « Koh Lanta à côté c'est du pipi de chat ! » avia scrittu l'omu. For' chì u tippu campava tranquillu tranquillu in un appartamentu di Melun...

RIP

S'ampara a morte di u cummediante francese Christian Barbier. Nè cumpletamente Christophe Barbier, nè mancu Christian Clavier. Peccatu...

Libertà

U cummediante di a seria « Plus Belle la Vie », Laurent Kerusoré, hè statu cappiatu dopu à dui ghjorni di guardia à vista pè una baruffa in Marseglia.

Ciò ch'è s'hè **veramente**
passatu...

Des chiffres et des lettres

Ange Santini hà ricunnisciutu chì i càculi èranu stati fatti di traversu è chì u stradone cusì aspettatu trà Bastia è Fulelli serà funziunale in u 2018 (!). Dopu à u spaventu d'avè persu u travagliu di 50 anni di criscenza, hà quantunque dichjaratu chì ùn ci vole à inquietacci, ci hè digià una strada trà Bastia è Fulelli. Bastava à pensacci. Quandu sò e territoriali digià ?

Megan Fox



L'attrice Megan Fox dichjara ch'ella hè cuscente di fà carriera unicamente grazia à u so fisicu. Anne-Marie Natali dinù...

Gronaldo in Furiani

Eccu ciò ch'ellu hà rispostu Jean-Claude Darcheville (dettu Gronaldo) à Presse-Ocean.fr à una dumanda nant' à qualesu hè u peghju publicu di Francia : «Celui de Bastia. Ce sont vraiment des c... J'aurais bien aimé que le club descende en CFA. Dès lors, il n'y aurait pas de déplacement là-bas... (sic) ». Ma ch'averanu fattu i Bastiaci per esse cusì gattivi ?

SCB : macciacci dapoi 1905

Derby : Bastia mette una concia 1 à 0 à l'ACA. In una ambienta istèrica vicina di a Bombonera di Buenos Aires, u Sporting ùn hè più ultimu ma 19esimu. Ciò ch'è bè hè chì avà in Furiani sapemu cuntentacci di pocu...

Hitler ghjucava in 4/4/2

D'appressu à un test fattu in e scole inglese, 5% di i zitelli brittànichi pensanu chì Adolf Hitler era intrenore di club di futbol. 5% pensanu chì l'holocauste hè una festa è un zitellu nant' à sei s' imagineghja u campu d' Auschwitz cum'è un parcu d' attrazione. Ci hè u travagliu per i professori di storia...

World record

L'omu u più grande di u mondu Bao Xishun 2,36 cm è u più chjucu He Pingping 73 cm, sò propiu goffi trumindui i corci...



È dalli...

Villepin, Pasqua è Chirac sò stati mandati in tribunale. « Il faut mettre les terroristes hors d'état de nuire une bonne fois pour toutes ! » L'anu detta tante volte quand'elli èranu in eserciziu, sò stati intesi. Era ora !

A tribbuna Sud di u stadiu di Furiani hà brusgiatu. Per una volta qualchissia hà messu u focu nant'à stu pòvaru terrenu abbandunatu da u talentu dipoi anni è anni...

A creazione artistica corsa hè in pienu sviluppu. Sortenu libri, dischetti, pezze di teatru è scenette à a televisiò à sbuzeffu. Puru ùn ci hè sin'à oghje nisunu filmu di culu in lingua Corsa. S'aspetta u 2010.

SAX
CAFE

Rue Neuve St Roch à Bastia

Chì hè : «esse corsu» ?



À u mumentu induve Eric Besson lancia u dibattitu nant'à l'identità francese, ci pudemu ancu noi pone a dumanda di l'identità corsa. Eccu unepoche di piste...

À noi altri Corsi ci piacenu l'appiccatoghji nant'à e vitture : « je suis corse, j'en suis fier », « souvent conquise jamais soumise » è « sò corsu, aghju l'autocollant »

Semu attaccati à u nostru paese... ma ùn ci cullemu mai

Tenimu caru a nostra casa di paese... ancu s'è no ci stemu trè ghjorni à l'annu

Semu attaccati à a nostra cara lingua corsa... ma ùn l'amparemu micca à i nostri figlioli

Vulemu mette fora st'eletti manghjoni... ma vutemu per elli à e prussime elezioni

Mughjemu contr'à u piston... ma circhemu una piazza per u nostru figliolu

Mughju « A droga fora ! »... ma mi ne techju ogni sabbatu sera

Ci piace à lagnacci di a Francia assassina chì ci arruvina... sopr'à tuttu quand'è no semu funziunarii

Ci stumacanu i turisti... sopr'à tuttu quandu sò elli à facci campà

Ci lagnemu contr'à a violenza... ma semu belli cuntenti di vede u bor'di mare micca bettunizatu

« Vergogna à tè chì vendi a terra »... ma aghju messu a mo casa di paese nant'à ebay

Semu fieri di a « sulidarietà trà di Corsi »... ma passemu u nostru tempu à esse ghjelosi è à tazzacchi trà di noi

Femu tutti i ribelli machjaghjoli... ma u nostru sonniu hè di travaglià à u Cunsigliu Generale

Sò republicanu è democraticu... ma sò u tercanu per trafficà l'elezzioni

Sò un rivuluziunariu è aghju messu l'autocollant Che Guevara... nant'à a u mo Porsche Cayenne

Evviva a tullerenza è a sulidarietà... ma sò un patrone chì pigliu à calci in culu i mo impiegati

Mi piace à difende a natura... ma sbondu tuttu cù u mo quad

Mi piace a cultura corsa d'oghje : l'Acapulco, David Guetta è Tony Montana

« Lingua corsa obbligatoria ! »... ma corsu, i mo figlioli ùn ne facenu in scola

Hè bè l'Università di Corti...ma micca per u mo figliolu

U veru corsu s'ampara in casa... ma ùn lu parlemu micca.

Cyberfucilata

U corsu vole esse ufficiale nant`à Internet !

Spessu vistu cum'è u locu di a libertà, Internet hè un terrenu di più per a spressione di a guerra di e lingue. Di pettu à 10 anni fà, a parte tenuta da l'inglese si n'hè trafalata ma in giru à 12 lingue assufòcanu u cyberspaziu cun 98% di u cuntenuutu ! È allora u corsu ?



Da a prima uchjata, pochi siti pruponenu un interfaccia nustrale ma Google è Netvibes sò oramai disponibili. Solu capatoghju, ùn la ferete micca à chjode una ricerca à i siti nustrali. È cosa cridiate ? In u filu di u so statutu in a sucetà, a nostra lingua ùn hè ancu « ufficiale » nant`à u cyberspaziu ! A m'aghju pruvata à dumandà à i webpatroni di Facciabotte, ma v'anu rispostu à voi ?

Pornò trasciu è cyberchjam`è rispondi

Allora dipoi u bottu di u web 2.0, s'hè vistu u sviluppu di bloghi in corsu ma quale ellu fussi u puntellu, spessu, a tematica hè patrimoniale o patrimonialista. Ùn li sintite i lagni trimulenti di l'eterni scunfittisti di u mantenimentu ? Bisognu ci n'hè dinù, ma non troppo, per piacè !

Di quandu in quandu, e virsure e più tradiziunale cum'è u chjam'è rispondi si ficcanu, cun d'altre forme, in i lucarelli i più « in piazza » cum'è FB. Ancu di grazia a manu di a Gazzetta di Mirvella (<http://mirvellagazetta.forumactif.net/>) hè passata à sciaccà « paffate » à u webucciu corsu. Cusì, ch'ella fussi nant`à u Foru corsu (<http://foru-corsu.forumactif.com/>) o nant`à bloghi particolari, si rimarca una creazione chjucuta assai è innuvante. Sò ste specificità di u web corsu chì li danu u so suchju è u so sensu. Ùn si tratta per nisunu di traduce solu siti o nutizie. Ciò chì impreme hè di porghje un cuntenuutu uriginale, pruduttu è disponibile solu in corsu.

Trapassà u tempu di u militantisimu

Fattu si stà chì a creazione hè spessu quasi solu u fruttu d'attori sociali « militanti » chì sò à l'unghe. Finu à chì u putere puliticu ùn ci s'impignerà, a webcursufunia, più durevule, di l'impresu è di l'amministrazione ùn hè ancu à nuralizà si. Hè cusì chì u corsu a si prova à adattà si à l'evuluzione di a socialità isulana chì grazia à Internet, a nostra voce trapaneghja infine ogni muntagna, fin'à e frontiere di Spagna...



I rigali ch'ellu ùn ci vole micca à fà per Natale



1

1. A maglia di Franck Ribery
Bisognu d'aghjustà qualcosa ?

2. I dischetti di Pascal Obispo

Nanzu Pascal Obispo si chjamava Pascal Obispo. Presu di schisufrenia megalomana, avà ci vole à supportallu sott' à u nome di « Captain Samourai Flower ». Duie identità, dui volte di più d'Obispo, duie volte di più di scumpienti...

**3. Un paghjù di scarpi
« à ghjanda »**

In certi paesi risicate a prigìu s'è vo putate sti scarpi. Si capisce perchè.

4. Un chilò di figatellu cumpratu nant' à ebay

Nant' à ebay si pò cumprà figatellu corsu di porcu cinese fattu in Marsiglia. À quandu u prisuttu ch' ti ?

5. U libru : « Le braquage pour les nuls »

Ci hè abbastanza mitomani è maffiuselli in Corsica per aghjustanne di più...



6

6. DVD « Les 100 plus beaux buts de l'OM commentés par Thierry Roland »

Un'ora è mezu di videu di l'OM commentata in più di quessa da Thierry Roland... In francese si chjama « la double peine ».

7. DVD « les meilleurs moments de Contrastu, saison 3 »

À u programma di u DVD : Jean-Vitus è Joseph-Guy contr'à Jérôme Polverini, Paul Natali, Emile Zuccarelli o Paul-Antoine Luciani. Da finisce sott' à lexiomil.

8. CD René Luce, Vincent Delerm & Christophe Maé chantent Michael Jackson

U CD si duveria vende cun una scatula di « boules quiès ». Si per disgrazia qualchissia vi rigala què, pudete sempre ghjuvavvi di u dischettu per un ball-trap.



4



3



2

L'anu pruposta nant' à
apiazzetta.com

*U libru di Corse Matin :
« Nos plus beaux articles
sur les gendarmes »*

*A sciarpa di
Christophe Barbier*

*L'intégrale di André
Rieu in 14 DVD*

*U CD : « L'Arcusgi chantent
les plus belles chansons de
la légion étrangères feat.
Mireille Mathieu »*

I rigali

ch'ellu ci vole à fà



3



2



7

1. A tenuta di Michael Jackson

Più ch'è mai à a moda, a panuplia di MJ hè u must di u rigalu di Natale. Per flambà à e riunioni di famiglia, e feste patrunale o à u travagliu.

2. Una buttiglia di Butagaz

In pienu dibattitu nant'à l'ecchippamentu energeticu di a Corsica è u GALSI, in fin di contu l'antica buttiglia di Butagaz saria a soluzione a più ecologica.

3. L'Epuepa di u Sporting in VHS


Rigalate stu doppiu ogettu collector di u seculu passatu : un scagninu VHS è u Sporting. Siate vintage !

4. Una crema anti cellulite

L'Ideale s'è vo vulete rompe cù a vostra cumpagna.

5. Un kit per fà a pulizia

L'ideale s'è vo vulete rompe cù u vostru cumpagnu.



5

1

6. U libru « Ma vie, mon oeuvre » di Tommy Recco.

U più grande di i tonti pericolosi vene infine di scrive un libru, cù un prefaziu di l'adjudant Chanal. Da leghje ! Edizione Francis Heaulme, 20 €.

7. A cagula anti H1N1

Megliu ch'è u vaghjolu di Roselyne Bachelot, più siguru ch'è u Tamiflu : a cagula !

8. U DVD « Comment survivre seul face aux pumataghji » di Jean Pierre Treiber

Più forte ch'è Koh-Lanta, più difficiule ch'è u GR20, amparate à campà cum'è un veru salvaticu !

9. Un ritrattu tamantu di Emile Zuccarelli

L'ideale per calmà i vostri zitelli ch'i facenu u tazzu in casa.

Intervista 1N2

incù Louis Franceschi



Napuleò o Pasquale Paoli ?

1 N

Ma esiteghju appena... l'incontru ritornu in Ponte Novu risica d'esse assai difficiule...

Christophe Barbier o Christian Clavier ?

1 2

Hè una scelta « Curneliana » chì si doverebbe pone per Pasqua ! sò duie « closce » o « cloche » ! Ci tocca à aspettà l'azzuffu ritornu in Calapurcina.

Emile Zuccarelli ou Emile & Image ?

1 2

Mi stumacanu tutt'è dui...

Gifi o Eurobazar ?

1 2

Sò lochi induva omu perde u so tempu è ùn trovi mai ciò ch'è tù cerchi... IKEA ?

Mouss'or o Mouss Diouf ?

N 2

Mouss'or ! micca tantu per u culore... ma per u gustu !

Joseph-Guy Poletti o Jean-Paul Poletti ?

1 N

Per e canzone ch'ellu scrive, micca per ciò ch'ellu dice !

ACA o Sporting ?

1 2

Sò squadre di ballò... ? à quandu una squadra NAZIUNALE ? Tandu vuteraghju !

Nouvelle Star o Joey Starr ?

1 2

Nouvelle Star : tamanti carnivali... Joey Starr : tamantu carnalone...

L'Armata di l'ombra o Sò elli ?

1 2

Vistu chì l'Armata di l'ombra, sò elli...! è in più di què ghjocanu à bughju...

Antoine Marielli o Antoine d'Atoll les opticiens ?

1 N

« Antò » l'òtticu di « Mur'Atoll » chì ellu mi pò sempre amparà qualcosa... è perchè micca Antò Albertini è a so squadra ?... L'altru ùn lu cunnoscu micca...

Marina Raibaldi o Marine Le Pen ?

N 2

Hè quantunque più simpàtica... Cum'ellu si dice in francese « y a pas photo » !

Maì Pesce o Maïté ?

N 2

À sceglie preferiscu Maì Pesce chì Maïté mi dà u ribrezzu cum'è Jean-Pierre Coffe !

Raymond Domenech o Fethi Harek ?

N 2

Cusì a squadra francese di ballò scizza sùbitu è ùn senteraghju micca trumbà e vitture cu e bandere turchine, bianch'è rosse indè i carrughji di Bastia !

Antò Drobnjak o André-Pierre Gignac ?

N 2

Ancu s'ellu ci hà fattu ride cù i so pedi quadrati !

Thierry Henry o Thierry Roland ?

1 2

Ùn ci hè nunda à dì ... O troppu...

Johnny Halliday o Johnnie Walker ?

1 N

Per finì in ratalegghju...

Jean-Pierre Treiber o Jean-Pierre Madère ?

N 2

Hà fattu parlà d'ellu qualchì tempu, è assai di più..

Nicolas Dieuze ou Nicolas Sarkozy ?

1 2

Nicolas Dieuze... heuuu... quale hè ? un ballerinu, un spurtivu, un ministru ?

Le père Fouras o Le Père Noël ?

1 2

O zitelli hè longa ! Torna una quistione à dorme fora... à schivu !

Hubert Tempete o Gaspard N'Gouette ?

N 2

Benchi à l'assemblea di Corsica i còmichi sò parechji è Hubert hà a cuncurrenza ! Forza Hubert !



**Laverie
du Port**

25 r Luce de Casabianca
20200 BASTIA

04 95 32 25 51

FOOTCORSE
.COM
FOOTCORSE



FootCorse
.COM

TOUTE L'ACTUALITÉ DU FOOTBALL CORSE :
L2, CFA, CFA2, DH, PHA, PHB, PHC, JEUNES...



TONY BAR

Bar - Restaurant - Cyber

**v`augura whisky è coca
pè tuttu l`annu !**

Lieu dit Piazza 20228 LURI - Tél. : 04 95 35 00 21

E vere dumande

ch'ellu ci vole à ponesi

Internet rende bestia ?

Fidighjate appena ciò ch'è vo site diventatu dapoì ch'è vo site nant'à Facebook ! Passate ore sane à ùn fà nunda, à leghje bestialità senza interessu, à fà test ch'ùn ghjovanu à nunda, à fidighjà ritratti di ghjente in burdata. Hè dunque quessa a biblioteca universale chì duvia purtā a cunniscenza à tutti prumessa à u principiu d'internet ? Certi circadori si ponenu a dumanda : nant' à u net si leghje menu, hè più difficiule di cuncentrassi ch'è quand'ellu si leghje un libru, si memorizeghja menu... è si perde assai tempu in pazzie.



Paul Giacobbi serà in u prussimu episodiu di i Simpson ?

In un episodiu di i Simpson, si vede à Carla Bruni è Nicolas Sarkozy scumbatte cun Homer. Quale serà u primu omu puliticu corsu à avè a so faccia gialla in a celebre seria TV ? Si parla di quellu chì face u so footing cun Sarko, un certu Paul Giacobbi.

U figatellu chinese serà bonu quist'annu ?

Ogni inguernu hè a sempiterna dumanda. Tocchi ancu noi da a mundializazione, manghjemu figatellu di porcu allevatu in China cun brocciu di latte sardu è farina pisticcina albanese.

A maffia russia averà infine da ripiglià u Sporting ?

Avà chì a maffia russia hà infine finitu per investisce in Corsica in parechji prugetti immobiliari, ristoranti è buatte di notte, saria un bè chì i nostri amichi amatori di vodka mettissinu qualchì soldu in u Sporting. Vistu u successu di a cocaina è i pruffiti di u tràfficu di droga in Corsica, ùn sò micca i soldi chì li mancanu.

I Corsi à u museu di l'UNESCO ?

U cantu in paghjella hè statu scrittu in a lista di salvamentu d'urgenza di l'UNESCO. Bella ricunniscenza internaziunale di u nostru patrimoniu minacciatu di smarisce per sempre si nunda hè fattu. Prussima tappa : a ricunniscenza i u Populu Corsu cum'è « tribu indigène menacée de disparition ».

BILLARD 2000

SNACK - BAR

Salle de Billard - Snooker - Anglais - Américain - Français

RN 193 - Lieu di CANALE - 20600 FURIANI

Tel : 04 95 30 87 48

Plaçothon

Dumandate a vostra piazza !

*Ùn circate micca un travagliu, ma una piazza ?
Pruffittate di l'elezzione chì s'avvicinanu !*

2010, annata d'elezzione serà infine per voi l'occasione d'avè una piazza. Ci ne serà à più vulè ne : Cunsiglii Generali, ODARC, Offizii, pumpieri, ospidali, ADEC, DDE, CAPA, Cumunità di Cumune, pulizia municipale, Càmera di cummerciu... Serà per voi l'occasione di di à i vostri eletti quantu i tenite cari. Più difficiule : serà dinù per voi l'occasione di vede quantu a vostra famiglia vi tene caru è quantu sò pronti à

vutà per quellu chì vi buscherà una piazza. Saperete cusì nant'à quale pudete cuntà in a vostra famiglia è quantu pesa. 20, 50, 70 voti ? S'è vo «pistrate» 100 voti è più, sàppiate ch'è pò pudete avè pretensione di bella piazza. Ùn mancate micca st'occasione unica ! Tutte e vostre dumande seranu accettate ! Fate in furia, durerà solu 3 mesi, l'elezzione sò di marzu !

Infine, sàppiate chì u serviziu dumandatu serà prupurziunale à u nùmeru di voti purtati : **un frigò costa 10 voti, una strada incatramata 20 voti, a custruttibilità d'un terrenu di bor'di mare 50 voti.**

Allora empiite è mandate stu biglittinu à u vostru elettu :

PRUMESSA DI VOTU


PIAZZA DUMANDATA :

DDE	<input type="checkbox"/>
ODARC	<input type="checkbox"/>
Office hydraulique	<input type="checkbox"/>
ADEC	<input type="checkbox"/>
ATC	<input type="checkbox"/>
Conseil Général 2B	<input type="checkbox"/>
Conseil Général 2A	<input type="checkbox"/>
Mairie de Bastia	<input type="checkbox"/>
CAPA	<input type="checkbox"/>
Police municipale	<input type="checkbox"/>
Chambre de commerce	<input type="checkbox"/>
Place de parking	<input type="checkbox"/>
Place pour le concert de Diam's	<input type="checkbox"/>

SERVIZIU DUMANDATU :

PENSIONE DUMANDATA :

Cun sta prumessa di votu, m'ingagiu à empie l'urna è à fà vutà per voi _____ voti (l'amichi nant'à Facebook ùn contanu micca.)



SPECIMEN

©coppirighttu : via macagnola viamacagnola.blog.mongenie.com)

Sustenite A Piazzetta : Abbonatevi !

A Piazzetta hè un giornale **GRATISI**, fattu da una squadra di **BENEVULENTI**. Tiratu à 12 000 esemplarii, hè distribuitu in parechji lochi di Corsica. S'è vo volete aiutacci, pudete abbonavi à u nostru giornale per ricevelu in **CASA VOSTRA**.

Nome : _____ Casata : _____

Indirizzu : _____

Codice pustale : Cumuna : _____

6 nùmeri (15 €)

Sustegnu (30 €)



Mandate u vostru sceccu à l'ordine di :

L'Associu Lingua Scritta
1, ruelle du Dragon
20200 Bastia



A Piazzetta hè un giornale gràtisi chì esce tutti i dui mesi, publicatu grazie à u premiu Ghjovani in Mossa.

S'è vo avete ancu voi un prugettu, andate à vede : www.corse.fr/jeunesse_sport/

Stu giornale hè statu publicatu dinù grazia à l'aiutu di a cumpagnia Corsica Ferries.

Hè editatu da :
L'associu Lingua Scritta
Res. Orezza 2 20200 Bastia

Hè realizatu da :
Una squadra di benevulenti

Hè statu stampatu in Corsica à 12 000 esemplarii :
Stamperia AZ Diffusion
Erbaghjolu 20600 Bastia

A Piazzetta hè dinù nant'à internet :
www.apiazzetta.com
www.facebook.com/apiazzetta
twitter.com/apiazzetta
apiazzetta@free.fr

ISSN : 2101-9193



Centru Culturale Universitariu Prugrammazione culturale ghjennaghju - aprile 2010



Entrata :

10 €
5 € prezzo studentinu

(Pussibilità d'abbunamentu)

Infurmazione è riservazione :

Centru Culturale
Universitariu
Tel. 04 95 45 00 78
lminico@univ-corse.fr

Cortinscena - Scontri teatrali

8 ore è mezu di sera, Spaziu Culturale Natale Luciani,
Campus Mariani, Corti

Mercuri 27 ghjennaghju

« Gelsomina » di Pierrette Dupoyer
Messa in scena è interpretazione :
Marie-Joséphine Susini.

Mercuri 10 ferraghju

« Histoires courtes : la fleur à la
bouche, amis intimes, pourquoi »
di Luigi Pirandello
Messa in scena : François Orsoni
Cumpagnia Nénéka

Mercuri 10 marzu

« Les Bonimenteurs » di Didier
Landucci è Jean-Marc Michelangeli
Boulègue production,
Cullaburazione artistica Carlo Boso

Mercuri 17 marzu

« Crave (Manque) » di Sarah Kane
L'Equipe de Nuit, Antonia Buresi

Mercuri 24 marzu

« L'illusion comique, S'ella hè vera
què... » di Pierre Corneille
U Teatrinu

Mercuri 14 aprile

« Le Cantique des Cantiques :
Opéra-Rock, entre le sublime et le
terrestre »
Associu Culturale Franco Rumenu
Mnémosyne

10 ragioni

d'ùn micca fà rigali pè Natale



1. Site fusciatu, sbaiuccatu, u vostru contu in banca hè à paghjolu...

È voi vulete fà rigali à i vostri parenti è cuginucci, zii è zie ch'è vo vidite una volta à l'annu ? O ghjente, ghjè a crisa ! Lasciate corre i rigali pè quist'annu, si viderà in 2010.

2. Basta u cunsumerisimu !

Tanti soldi spulati quando a maiò parte di u pianeta ùn hà nunda à manghjà. Aiò, appena di mudestia in st'epica di surcunsumazione occidentale.

3. Vi facenu tutti cacà. Perché ùn micca dilla franca è chjara ?

I vostri parenti sò tutti azezi, ghjelosi, gattivi è antipatici cun voi. Pensate veramente

ch'elli si meritanu un rigalu ? Ùn site micca Mère Thérèse è u téléthon hè passatu. Passate u vostru giru !

4. Pensate di fà piacè ? Vi sbagliate...

D'appressu à un sundagiu, 43% di a ghjente dichjara ùn esse micca cuntenta di i so rigali di Natale. Voi straziate ore sane à circà di fà piacè, spendite i vostri soldi, fate a coda in i magazini cum'è lonzi, tuttu què per chì sti mullizzi si lagninu è ch'elli i rivendinu dopu nant'à ebay...

5. U risicu di riceve un rigalacciu fràricu

Và bè fate un rigalu... ma dopu quellu chì li ne fate si crede obligatu di favvevine unu. Pigliate dunque u risicu di favvi rigalà l'ultimu CD di Vincent Delerm o u DVD di «Plus belle la vie». Da veru pericolosu...

6. Tuttu u mondu si face i listessi rigali !

Cumu nimu hà idee originali è chì nimu sà chì si fà, tuttu u mondu si compra listessa cosa. Top 3 quist'annu : Tempi Fà 2 di Pierre-Jean Luccioni (annu l'aghju ricevutu in 4 esemplarii pè Natale...), best-of di Michael Jackson è best-of di Johnny Hallyday (chì à mumenti diventa collector).

7. «Era megliu nanzu»...

Quantu volte l'avete intesa sta frasa ! «Di i mo tempi aviamu un aranciu, è basta ! È eramu cuntenti !» Ah iè ? Postu ch'ellu hè cusì, femuci appena di revival è di Tempi Fà cù un Natale vintage : à l'antica, è un aranciu per ognunu. È chì i vechji ùn si lagninu !

8. Avete tuttu in casa !

A televisiò l'avete, u lettore DVD ci hè, l'ordinatore viaghja, u frigò hè pienu è «Tempi Fà» l'avete in doppiu. Francamente, ùn avete bisognu di nunda. Fate parte di l'occidentali tratechji. Calmatevi appena, ùn dumandate nunda à Babbu Natale !

9. U sputritu «spiritu di Natale» : Ah u famosu «Xmas Spirit»...

St'invenzione mercantilista è zitellesca di l'Americani per vendeci a so rubbaccia. Tuttu u mondu deve esse bravu è generosu (vale à dì : cunsumà è cumprà) una volta à l'annu, è solu à u mumentu di Natale. Siate cuerente : siate bravu generosu tuttu l'annu ! O fate cum'è noi, siate azezu tuttu l'annu.

10. Babbu Natale hè in depressione

U vechju barbutu ne pò più. Rìtimu di travagliu infernale, minacce di delucalizacione è di licenzimentu, cuncurenza cinese... U tippu in rossu cuntava ancu dumandà a so mutazione à France Telecom. Almenu ch'ellu si trovi una piazza à u Cunsigliu Generale. À mumenti sò l'elezzioni, ùn si sà mai...